

# Director di APA ta reacciona riba insinuacionnan cu a sali publica

**ORANJESTAD** – Ayera e director di APA N.V., Johnny Kock, a tene un conferencia di prensa caminda el a reacciona riba publicacionnan cu a sali publica den cierto medionan di comunicacion encunto su nombracion como director na Aruba Ports Authority.

## ACLARACION

Señor Kock ta haya cu e mester aclara cierto cosnan pasobra ora cosnan incorrecto ta sali publica, despues di tempo hende ta kere cu ta berdad.

El a mostra cu prome e tabata sali den e prome pagina di Diario pero awor e ta den di cinco pagina, cual ta mostra cu e no ta dje popular mas. Sinembargo e ta gradici Diario cu e ta den di cinco pagina y no full patras pasobra e ora ey e no ta riba mundo mas.

Kock a splica cu e tabata miembro di Consejo di Comisario di Aruba Port Authority pa mas o menos tres aña na unda dicho Consejo di Comisario a delega su persona como director pa un periodo di seis luna.

Kock a mostra cu ora e periodo di seis luna pasa, e lo regresa den Consejo di Comisario. El a enfatisa cu e no ta manera a sali publica erroneamente director interino sino e director di

APA N.V.

## INSINUACION

Kock tambe a reacciona riba e insinuacion cu e ta representante di Alatec. El a desmenti enfaticamente cu e ta miembro di Alatec. El a splica cu Alatec ta e empresa cu a haci un estudio pa e ministerio di transporte pa ministerio di Transporte y Turismo tocante unda APA ta na e momentonan aki, unda APA tin cu bay. Tambe e empresa a haci un estudio con lo mester move e parti di carga o sea e kraan di container cu ta na Oranjestad, pa e waf na Barcadera.

## CONFLICTO DI INTERES

Aribaeacusacion di conflicto di interes, Kock a splica cu berdad e tabata director di Admiral Shipping pero no ta director mas. E no ta haya corecto con corant ta ataca e compania aki.

El a admiti cu e ta accionista di Admiral Shipping y cu despues di caba cu su contract di seis luna e ta bay dicho compania. El a mostra cu esun cu ta interesa por bay Camara di Comercio y busca un copia pa haya sa kende ta e director di Admiral Shipping. Kock a enfatisa cu e no ta director di Admiral Shipping.

Kock a splica cu e motibo cu Consejo di Comisario a apunta su persona pa bira

director di APA ta pasobra e tin 17 aña di experiencia den e negoshi di barco. E ta kere cu e sa suficiente pa fungi como director di APA. El a sigui bisa cu prome cu el a fungi como director di APA, e tabata director di tres compania cu semper a bay bon.

## DIRECTOR PERMANENTE

Kock a bisa cu APA lo bay haya un director permanente. E ta compronde cu e empleadonan

ta desea di tin un director permanente pero na e momentonan aki ainda e proceso ta andando. E ta kere cu prome cu su periodo di seis luna transcuri, gobierno lo nombra un director.

Kock a bisa cu despues di seis luna e ta bay pasobra e tin otro compromiso y no ta desea di keda cu e funcion di director di APA.

## MANEHO MALO

Actualmente tin hendenan di gerencia di APA cu vacacion. Kock a splica cu e motibo cu e hendenan ta cu vacacion ta pasobra den pasado tabatin mal manejo caminda a tolera hende acumula 400 dia di vacacion. E ta haya



esaki masha malo mes. Esei ta mostra cu den e ultimo 18 añanan e persona aki no a bay un vacacion drechi y esei no por.

E ta haya cu tur hende mester haya vacacion y gosa di nan tempo liber. Kock no ta haya cu esaki ta un cuestion cu mester haya publicidad.

## TEST DI DROGA

Kock a splica cu e ta haciendo un reorganizacion na APA. Un di e partinan di reorganizacion na APA ta cu tur empleado prome cu nan haya nan badge permanente, mester haci un test di droga. Esaki lo bay keda introduci dentro di poco.